

## Mir Flerschemer werrn all

Joo werklich, habb isch zum Kättche, dem Schorsch soine Fraa gesaad, wie merr uns uff de Gass getroffe hawwe, mir Flerschemer werrn all.

Honnes, wie moonsden dess?, frächts Kättche.

Isch saach: Wie long issen dess her, dass in Flerschem koo Kinner mieh uff die Welt kumme? Ei unser Kinner unn aach zwaa vunn unserne Enkel sinn im Flerschemer Kronkehaus geborn worrn, dess sinn noch Flerschemer, egal wo se jetz wohne unn lewe. Isch saach derr, wenn in kooner Kennkart unn in koom Pass de Geburtsort Flerschem mieh ze lese iss, dann isses aus mett de Flerschemer, doo werrn merr all.

No ja, seets Kättche, isch waaß nitt, ob dess in de Babiern stieh muss. Hauptsach merr dut hier wohne, lewe unn aach sterwe.

Isch druff: Grad beim Sterwe werrde dess merke, Kättche. Weil in Flerschem konnsde doch gugge wohie de willst, merr dut nor noch Fremme seh, uff de Gass unn beim Oikaafe in de Kolonnade. Ei wonn dess su weidergieht, iss bei unserne Beerdischung nor noch de Parre debei unn die Familie, weil wer uns nitt gekennd hott, warum soller mett unserne Beerdischung gieh?

Wie kimmsde donn heit uff su e Thema?, frächts Kättche weider, hott dess velleichd ebbes meddem Kronkehaus ze due, was jetz zugemacht werrn soll?

Ja, saach isch, weil vill vunn dem, was ferr uns Flerschemer mett unserm Flerschem ze due hott, verschwinne dut, su wie jetz dess Kronkehaus, merr waaß nitt, was draus werrd. De Schitzehof iss joo schunn long abgerisse worrn, unn wer su wie isch gewusst hott, dass onn dere Stell e mords Haus gebaut werrd, hott immer gedenkt, dass dort su ebbes wie enn Flerschemer Middelpunkt, su enn Platz ferr Verostaldunge iwwerisch bleiwe deet. Awwer alles werrd zugebaut unn omm End iss dort nix, mett dem sich die neie Leit in Flerschem, wie seet merr, idendifizirn kenne.

No ja, seets Kättche, doo bleibts halt debei, unser Festscher misse merr nooch wie vor uffem Gallusplatz hinner de Kerrsch feiern, odder?

Isch habb geknorrd: Isch saach derr was, Kättche. Jetz sinnse joo grad omm Iwwerleesche, ob se nitt den Betonklotz vunn Galluszentrum nooch nor verrzisch Johr abreiße solle. Isch deet vorschlaache, reißt dess Ding ab unn dut dess ahle Parrhaus widder uffbaue, meddem Gadde unn dem Parrhof unn de Scheier dehinner. Donn hädde merr widder enn scheene Stadtmittelpunkt. Gugg emol, dess alde Parrhaus hott e paar hundert Johr gehalle unn de Beton nor verrzisch Johr, doo wers doch falsch, widder Beton ze verbaue, weil der muss in verrzisch Johr aach widder abgerisse werrn.

Dess Kättche hott de Kobb geschiddeld. Isch waaß nitt. Unn was hädd dess mett dene ze due, die wie de moonst koo Flerschemer sinn unn aach koo werrn?

Ja, saach isch, weil mir kennde nitt nor dort feiern, naa, mir kennde dess gude Stick mett de Galluskerrsch im Hinnergrund jedem Oigeplaggde ...

Oigeblaggde, seets Kättche, dess Wort ferr Neubürger habb isch long nimmi geheerd.

... jedem Oigeblaggde zeiche und saache: Guggt emol, dess iss unser Flerschem su wies schunn immer gewese iss unn wies aach bleiwe dut, isses nitt schee? Dess iss doch was, doo kennde doch aach Ihne unn Ihne Ihr Familie sich mett idendifizirn unn eschde Flerschemer werrn, odder? Sunnst werrn mir Flerschemer doch all!

Honnes, seets Kättche, was mächsde derr ferr Gedonke. Denk droo, wie ald de bist.

Ja, saach isch, grad dessdeweese.

Eiern Honnes